

Regional News Unit AIR Aizawl

Thursday, May 16, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma chuan Myanmar atanga Mizorama raltlan te chhinchhiahna tur bik, Biometric Enrolment Portal siam a nih tawh thu leh a taka an kalpui thuai tur thu a sawi.
- Chief Minister Pu Lalduhoman Mizoram Chamber of Commerce & Industry hotute leh Industry lama Mizoram hmasawna tur rawtna an neih hrang hrang te a sawipui.
- Lok Sabha inthlan thawh thum la awm atan Political party te theihtawpin an campaign chhunzawm.
- Ramchhunga thiamthil intihsiakna lian ber IndiaSkills 2024 chu nimin khan New Delhi ah tan a ni.



CM& CYMA

Chief Minister Pu Lalduhoma chuan Myanmar atanga Mizorama raltlan te chhinchhiahna tur bik, Biometric Enrolment Portal siam a nih tawh thu leh a taka an kalpui thuai tur thu a sawi.

Nimina Central YMA hruaitute nen an inkawmnaah he thu hi Chief Minister chuan a sawi a, Mizorama Ruihhlo dona lama hma latu State Level Core Committee pawh a rang lama koh tha a tih thu a sawi bawk.

Central YMA hruaitute hian, Myanmar atanga lo kal mi thenkhatte chungchang te, tun hnaia ILP dan bawhchhia engemawzat an man avanga mumal zawka ILP regulation kalpui tha an tih thu te leh Ruihhlo Do Core Committee kalpui thar leh tha an tih thute an thlen a ni.



CM

Chief Minister Pu Lalduhoma chuan nimin vek khan a office ah Mizoram Chamber of Commerce & Industry hotute a kawm a. Commerce leh Industry lama Mizoram hmasawna tur rawtna an neih hrang hrang te a sawipui.

MCCI hruaitute hian, Mizorama Cooperative Society hmanga mipuite tana awlsamna thlen theih dan te, Mau behchhan Industry dintute tana dawr ber tur Department neih tul an tih thute, Industrial Area chungchang te, Consultancy Firm leh Registered Contractor te inkara harsatna awm thei te, Tender chhangtute tana Work done certificate phut chungchang te, Mizoram chu financial literacy rate kan hniam avanga bank loan lak a har thu te, Inner Line Permit kalpui dan tha nia an hriat an rawtna te, EDP leh ESDP training hi department pakhat hnuaiah awm thei se thaa an hriat thute, SRI Scheme Hand Holding Policy nena kal kawptir theih an rin thu te, Bangladesh nena insumdawn tawna chungchang te leh thil pawimawh dang te an thlen a ni.

Chief Minister hian an rawtna te chu an lo zirchian tur thu a hrilh a. Chief Minister hi Pi R. Lalrodingi, OSD to CM chuan a tawiawm a ni.

<><><>

SAITUAL

PM POSHAN chungchang inzirtirna nimin khan Saitualah neih a ni a, State Nodal Officer, School Education Department Director, Pu Lalsangliana chuan he hun hi a hmanpui a,

PM Poshan chungchang sawifiahin, naupangte hnena pek thin chaw chhun, Mid-Day- Meal One Year Project chungchanga Central lama hma lak a nih thute a sawi a. Saitual District pawh MDM tha taka an kalpui thei chu lawmawm a ti a, Mizoram pum dinhmun ngaihtuahin hmasawmna tur erawh an nei niin a sawi.

Pu Lalsangliana chuan June ni 30 ral hmaa MDM hi zaa 100 a pek an nih loh chuan central lamin zaa 33 chu state sawrkarin a tum a ngaih tawh dawn avangin June ni 30 ral hma ngeia MDM hi zaa 100 pe hman tura theihtawp chhuah turin thawktute a fuih a ni

Zirtirtu indaihlohna chungchang chu sawifiahin RTE in zirlai mila zirtirtu awm zat tur a sawi nen chuan Mizoram chu la ziaawm tak a nih thu a sawi a, Udice-plus portal hmanga zirtirtu leh naupang awmdan te, schhol dinhmun te an hriat leh hmuh vek thu te leh sawrkar sum dinhmun thlir chungin rualkhai thei ang bera an sem rual thu te a sawi bawk.

He training ah hian Saitual Block huam chhung tangin Primary School 40, Middle School 36 leh Ngopa Block huam chhung atangin Primary School 17 leh Middle School 16 –a zirtirtute an tel thei a ni.

<><><>

DIRECTOR

Mizoram Akashvani Director (Eng) & Cluster Head Pu D R Lalropuia chu Deputy Director General (DDG) Engineering ah a kaisang a,

Pu D R Lalropuia hi kum 1997-a Indian Broadcasting Engg Service officer a lut a ni a, ramchhunga Prasar Bharati hnuaiah Engineer hna hrang hrang a chelh tawh a ni.

<><><>

LADC

Lai Autonomous District Council a Chairman Pu VL Hmuaka chuan Lai Autonomous District Council ah Sorkar thar a piang thei ta chu lawmawm a tih thu a sawi a.

Pu VL Hmuaka hian nimin khan a Chamber ah Lawngtlaia thuthar thehdarhtute kawmin, Sorkar a mumalloh chuan mipui ten an tuar thin a, LADC ah Sorkar thatak CEM viaktha leh kumlam ah pawh la naupang, thalai sukthlek hria an nei chu thil lawmawm tak a ni a ti.

Chanchinbumite zawhna chhangin Pu V.L.Hmuaka chuan MLA leh MDC chu a nihkawp theihloh tih District Council inekawlna dan ah a awmlo tih sawiin, MDC nilai, MLA a thlantlin an lo awmfo tawh a, hengte hian MDC zawk bansanin MLA an nizui tlangpui a ti a, a chhan ber chu duhamna rawngkai leh midang chherchhuahna kawng daltu anga an lantheih vangin nihna chelhkawp chu tih awma an ngaihloh vang a MDC zawk bansan thin an ni a ti.

Hetihlai Lai Autonomous District Council a Chief Executive Member thar Pu C.Lalmuanthanga chuan CEM atan laklulh a nih hnu ah Lairam Motherless Home a tlawh a.

C.Lalmuanthanga chuan Pathian malsawmna leh duhsakna changa Chief Executive Member atan laklulh a nih hnu ah, enkawltu Nu leh Pa neilo, hnuchamte chu an tan titheih liantak neilo mahse, a thinlungah ngaihpawimawhna liantak awm chu hlenchhuah duhin Lairam Motherless Home chu tlawh a nih thu a sawi.

Pu C.Lalmuanthanga chuan Lairam Motherless Home a thawkte inpekna chu chhuanawm a tih thu sawiin, tihve theih a neih apiangah an tan theihtawp chhuah a inhuam thu a sawi.

CEM hi a nupui Pi L.S. Pari leh United Legislature Party a hruaitu thenkhat ten an tawiawm a, Motherless Home tanpui nan CEM hian Rs. 10,000/- thawktute hnenah a hlan a ni.

<><><>

SERCHHIP

Serchhipa Inter Dist Women football nimina khelh zawh takah Aizawl Dist an champion

Senior women football nimina Serchhip Sport complex a final khelbah Aizawl Dist hian an khingpui Saitual Dist chu si 2 faia hnehin an champion a. Kharna inkhawm, Serchhip Dist Sport Association President kaihhruaiah khuallian Pu John Tanpuia Secy..Mizoram Sport Council in lawmman trophy a sem.

He inkhelhah hian Mizoram Dist hrang hrang aiawh team an tel kim a. Cindy Remruatkimi Aizawl Dist player Jersey no 10 chu Best player niin, goal 9 thuntu Aizawl team a mi bawk Lalrinmuani jersey no 20 chu top scorer a ni a. Aizawl Dist team a bawk Jeesey no 14 C.Zairemmawii chu player of the match a ni bawk.

<><><>

PC& AAP

Mizoram Aam Aadmi Party(AAP) leh PC Party ten Sawrkar khalh ngil tur leh ram leh mipuite hamthatna atan thawhho an tum tih an sawi a,

Nimin khan party 2 te hian Joint Meeting PC Party Office, Brig. T.Sailo Rûn, Treasury Square-ah an nei a, Meeting ah hian Office of Profit leh dan kalh MLA te chungchang te, Sawrkar hmalakna hrang hrang leh kal dan te sawiho a ni.

Meeting-ah hian Party president ve ve Pu Vanlalruata leh Pu Andrew Lalremkima te an tel a ni.

<><><>

MAMIT

Mau/Rua tam tirh a awm thin Thlangdar chi khat Thangnang chu tunlai hian Mamit leh a chhehvelah a puang nasa hle tih Mamit-a kan corr chuan a sawi a, thangnang te hi khawngin a hriak sawrin an hralh thin a ni.

Thlangdar chi khat Thangnang te hi rua/mau tam tirhin an puang thin a, tun tuma puang hian awmzia a neih leh neih loh chungchangah mithiamte thlirna tun dinhmunah hriat a la ni rih lo a ni.

Thangnang an puan hian thingkungah te a hu hovin an kai thin a, hei hi an man khawm a, sumah an den sawm hnuah tuisoah emaw tui nen an chhuangso a, a hriak an teng hnuah chawhmehah an hmang thin a ni.

Thangnang hriak pawh hi hralh chhuah thin a ni a, tunlai hian no khat cheng 50 in an zuar thin a ni.



CAMPAIGN

Lok Sabha inthlan thawh thum la awm atan Political party te theihtawpin an campaign chhunzawm a. Senior BJP hruaitu leh PM Narendra Modia chuan nimin khan Maharastra-a Nashik district-a Dindori ah thu a sawi a. COVID hrileng ramin alo hmachhawn danah khawvelin a fak hle a ti a. Damdawi man tlawm zawrhna Jan Aushadhi centre 600 chuang siam a ni tawh a ti bawk. PM Modia hian Kalyan ah kawngzawh a huaihawt bawk a ni.

BJP President JP Nadda pawhin vawiin hian Odisha-a Sundergarh leh Bargarh Parliamentary COntituency ah te vantlang inkhawmah thu a sawi dawn a. Vawiin vek hian Bhubaneswar ah kawngzawh a huaihawt bawk ang.

Hetihlai hian Congress hruaitu Rahul Gandhi chuan nimin khan Balangir-a bike rally ah a tel a. Odisha Chief Minister leh BJD hotupa Naveen Patnaik chuan state chung khaw thlang lamah vantlang inkhawm engemawzat a huaihawt a ni.



INDIASKILLS

Ramchhunga thiamthil intihsiakna lian ber IndiaSkills 2024 chu nimin khan New Delhi ah tan a ni a. Ni li chung huaihawt tur niin state leh Union Territory 30 atangin zirlai 900 chuang an kalkhawm a. Thiamthil intihsiakna huang 61 ah heng zirlai te hian an theihna an pholang dawn a. Hmanlai thiamthil leh tunlai technology hmang tangkaiin an intihsiak dawn a ni. Sawrkar laipuaia Skil Development Secretary Atul Kumar Tiwari chuan an thil huaihawt chu thalaite leh industry te tan hlawkna tur ve ve a ni a ti.

IndiaSkills a ti tha ber hian kumin September-a France khawpui pakhat Lyon-a Worldskills Competition ah ram ai an awh dawn a ni.



IMRAN KHAN

Pakistan Islamabad High Court chuan Pakistan Prime Minister hlui Imran Khan chu pound maktaduai 190 eirukna thubuaiah bail a phalsak. He thubuaiah hian Khan-a leh a nupui te chu real estate neitute hnen atangin cheng tluklehdingawn engemawzat thamna laa puh an ni a.

Islamabad High COurt-a Member pahnih awmna bench chuan bail an dilna a ngaihtuah hnuah a phalsak ta a ni. Court chuan cheng nuai 10 a inkhul chhuak turin a ti a. Hetihlai hian Imran Khan-a hi Iddat leh cypher thubuaiah man ala nih tho avangin Adiala jail hi a la chhuahsan thei chuang lo a ni.

<><><>